


PERKHIDMATAN MENCARI DAN MENYELAMAT MARITIM (CARILAMAT)

Perkhidmatan Mencari dan Menyelamat (CARILAMAT) Maritim secara amnya didefinisikan sebagai satu kegiatan dan usaha mencari, menolong dan menyelamat nyawa manusia yang hilang atau dikhawatirkan hilang atau berada dalam satu kejadian yang membahayakan nyawa seseorang semasa dalam pelayaran, penerbangan ataupun bencana tanpa mengambil kira kewarganegaraan atau status orang berkenaan atau keadaan orang tersebut dijumpai di laut.

Perkhidmatan CARILAMAT juga merangkumi aspek pengawasan kecemasan, komunikasi dan koordinasi operasi CARILAMAT. Perkhidmatan ini juga meliputi perkhidmatan seperti memberi bantuan dalam mendapatkan nasihat perubatan atau *Medical Advice* (MEDICO), bantuan awal perubatan kecemasan dan *Medical Evacuation* (MEDEVAC) melalui penggunaan pesawat udara, kapal dan bot sama ada aset dari pihak kerajaan dan swasta, termasuk kerjasama sukarela dari lain-lain komuniti dan kapal dagang yang ada berhampiran lokasi kejadian kecemasan.

Agenzia Penguatkuasaan Maritim Malaysia (APMM) telah mengambil alih tugas mencari dan menyelamat maritim dari Jabatan Laut Malaysia (JLM) pada 2 Jun 2006. Selaras dengan tanggungjawab baru tersebut, APMM telah menubuhkan Pusat Koordinasi Mencari dan Menyelamat Maritim iaitu sebuah *Maritime Rescue Coordination Center* (MRCC) PUTRAJAYA dan lima buah *Maritime Rescue Sub-Center* (MRSC) iaitu MRSC LANGKAWI, MRSC JOHOR BAHRU, MRSC KUANTAN, MRSC KUCHING dan MRSC KOTA KINABALU seperti di **Gambar Rajah 1**.




Gambar Rajah 1: Organisasi MRCC dan MRSC

MRCC PUTRAJAYA bertanggungjawab menyelaraskan semua operasi CARILAMAT di kawasan *Maritime Search and Rescue Region* (MSRR) Malaysia

dan juga memantau operasi CARILAMAT yang dilaksanakan oleh MRSC. MRCC PUTRAJAYA juga bertanggungjawab untuk mengkoordinasikan aktiviti bantuan bencana sekiranya diperlukan. Perkhidmatan CARILAMAT oleh MRCC serta MRSC ini beroperasi 24 jam 7 hari seminggu demi memastikan keberkesanan pelaksanaan operasi CARILAMAT dan sentiasa bersedia untuk menyelaras dan menggerakkan bantuan CARILAMAT sekiranya berlaku sebarang kecemasan atau bencana di laut.

Perkhidmatan dan pelaksanaan operasi CARILAMAT yang cepat dan berkesan ini dapat mengurangkan kesengsaraan mangsa kecemasan dan juga dapat menghindarkan kehilangan nyawa serta harta benda. Di samping itu juga, perkhidmatan yang berkesan ini akan memberikan gambaran yang positif kepada pandangan masyarakat tempatan dan komuniti maritim serta dapat meyakinkan kepada pihak antarabangsa serta organisasi antarabangsa seperti *International Maritime Organization* (IMO) dan *International Civil Aviation Organization* (ICAO) berkenaan perairan Negara yang selamat dan terkawal serta boleh diharapkan untuk memberi perkhidmatan dan bantuan segera kepada mangsa-mangsa kecemasan di laut. Ini secara tidak langsung akan memberi kebaikan kepada Negara dari segi promosi persekitaran maritim yang selamat serta akan menggalakkan pertumbuhan industri pertanian dan pelancongan, perdagangan, rekreatif, perhubungan maritim dan penerbangan sekaligus memberi kesan yang baik kepada pertumbuhan ekonomi Negara.

Maritim Malaysia dalam melaksanakan fungsi dan tanggungjawab sebagai penyelaras operasi CARILAMAT telah melalui pelbagai cabaran dalam usaha memenuhi keperluan untuk memberi respon kepada kecemasan yang berlaku di kawasan perairan tanggungjawab negara yang diwartakan. Ini kerana kawasan tanggungjawab CARILAMAT Maritim Malaysia, MSRR adalah luas di mana ia meliputi pantai barat Semenanjung Malaysia, dari Selat Melaka hingga ke Laut Andaman, di sebelah Timur Semenanjung Malaysia dari pantai hingga ke Zon Ekonomi Eksklusif (Laut China Selatan) dan di pantai Sabah dan Sarawak hingga ke Laut Sulu seperti di **Gambar rajah 2**.



Gambar rajah 2: Kawasan Maritime Search and Rescue Region (MSRR)

Bagi komuniti maritim yang memerlukan bantuan kerana mengalami kesukaran di laut atau berlaku kecemasan di laut atau terlihat atau mempunyai maklumat berkenaan insiden kecemasan di laut, hendaklah menghubungi MRCC atau MRSC secepat mungkin dengan memberi maklumat yang tepat supaya bantuan sewajarnya atau operasi menyelamat dapat diaktifkan dengan kadar segera. Maklumat boleh juga disalurkan kepada MRCC atau MRSC dengan cara menghubungi atau membuat laporan di mana-mana Pejabat Maritim Negeri, Zon Maritim atau Balai Polis yang berdekatan atau membuat panggilan kecemasan 999.